

**ՀԱՅԱՍՏԱՆԻ ՀԱՆՐԱՊԵՏՈՒԹՅՈՒՆ**  
**ԿԵՆՏՐՈՆԱԿԱՆ ԸՆՏՐԱԿԱՆ ՀԱՆՁՆԱԺՈՂՈՎ**

02 հունիսի 2026թ.

N 223-Ա

**Ո Ր Ո Շ ՈՒ Մ**

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԱԶԳԱՅԻՆ ԺՈՂՈՎԻ 2026 ԹՎԱԿԱՆԻ ՀՈՒՆԻՍԻ 7-Ի  
ԸՆՏՐՈՒԹՅՈՒՆՆԵՐԻՆ ՄԱՍՆԱԿՑՈՂ «ԲԱՐԳԱՎԱՃ ՀԱՅԱՍՏԱՆ» ԿՈՒՍԱԿՑՈՒԹՅԱՆ  
ԸՆՏՐԱԿԱՆ ՑՈՒՑԱԿՈՒՄ ԸՆԴԳՐԿԱԾ ՊԱՏԳԱՄԱՎՈՐԻ ԹԵԿՆԱԾՈՒ ՆԱԻՐԱ  
ՀԱՐՈՒԹՅՈՒՆՅԱՆԻՆ ԱԶԱՏՈՒԹՅՈՒՆԻՑ ԶՐԿԵԼՈՒ ՀԱՄԱՁԱՅՆՈՒԹՅՈՒՆ  
ՏԱԼՈՒ ՄԱՍԻՆ**

Հայաստանի Հանրապետության գլխավոր դատախազության Հայաստանի Հանրապետության հակակոռուպցիոն կոմիտեում մինչդատական վարույթի օրինականության նկատմամբ հսկողության վարչության պետ Ա. Փանոսյանի կողմից 29.05.2026թ. թիվ 12/29/(3)-26 գրությամբ Հայաստանի Հանրապետության կենտրոնական ընտրական հանձնաժողով է ներկայացվել միջնորդություն՝ Հայաստանի Հանրապետության Ազգային ժողովի 2026 թվականի հունիսի 7-ի ընտրություններին մասնակցող «Բարգավաճ Հայաստան» կուսակցության ընտրական ցուցակում ընդգրկված պատգամավորի թեկնածու Նաիրա Վիգենի Հարությունյանին ազատությունից զրկելու համաձայնություն ստանալու մասին:

Հայաստանի Հանրապետության կենտրոնական ընտրական հանձնաժողովը 2026 թվականի մայիսի 3-ին կայացրել է «Հայաստանի Հանրապետության Ազգային ժողովի 2026 թվականի հունիսի 7-ի հերթական ընտրություններին մասնակցելու համար «Բարգավաճ Հայաստան» կուսակցության ընտրական ցուցակը գրանցելու մասին» թիվ 66-Ա որոշումը:

«Բարգավաճ Հայաստան» կուսակցության ընտրական ցուցակի 57-րդ հերթական համարի պատգամավորի թեկնածու է գրանցվել Նաիրա Վիգենի Հարությունյանը:

Կենտրոնական ընտրական հանձնաժողովի նիստին մասնակցել են Հայաստանի Հանրապետության գլխավոր դատախազության Հայաստանի Հանրապետության հակակոռուպցիոն կոմիտեում մինչդատական վարույթի օրինականության նկատմամբ հսկողության վարչության ավագ դատախազ Վերժինե Առաքելյանը և Հայաստանի Հանրապետության գլխավոր դատախազության Հայաստանի Հանրապետության հակակոռուպցիոն կոմիտեում մինչդատական վարույթի օրինականության նկատմամբ հսկողության վարչության ավագ դատախազ, դատախազական խմբի անդամ Ծովակ Մնացականյանը:

Կենտրոնական ընտրական հանձնաժողովը՝ բավարարելով ՀՀ հակակոռուպցիոն կոմիտեում մինչդատական վարույթի օրինականության նկատմամբ հսկողության վարչության ավագ դատախազ, դատախազական խմբի անդամ Ծովակ Մնացականյանի միջնորդությունը՝ նիստն անցկացրեց դռնփակ:

Կենտրոնական ընտրական հանձնաժողովն արձանագրում է, որ 2026թ. հունիսի 02-ին՝ ժամը 11:00-ին կայանալիք արտահերթ նիստի մասին Նաիրա Վիգենի Հարությունյանը ծանուցվել է 30.05.2026թ. պատվիրված առաքանիի միջոցով (առաքանի N 555721853, ուղարկող Կենտրոնական ընտրական հանձնաժողով, ստացող Նաիրա

Վիգենի Հարությունյան, մարզ Լոռի, /գ. Փամբակ, Դեբեդ 9 փողոց, տուն 9), ինչպես նաև հեռախոսազանգի և հեռախոսահամարին հաղորդագրություն ուղարկելու միջոցով:

Կենտրոնական ընտրական հանձնաժողովի նիստին ներկայացել և մասնակցել են նաև «Բարգավաճ Հայաստան» կուսակցության ընտրական ցուցակի պատգամավորի թեկնածու Նաիրա Հարությունյանը և վերջինիս շահերը ներկայացնող փաստաբան Վահագն Բաբայանը (փաստաբանական գործունեության արտոնագիր N 503): Փաստաբան Վահագն Բաբայանի կողմից ներկայացվեց միջնորդություն տրամադրել ժամանակ՝ Ազգային ժողովի 2026 թվականի հունիսի 7-ի ընտրություններին մասնակցող «Բարգավաճ Հայաստան» կուսակցության ընտրական ցուցակում ընդգրկված պատգամավորի թեկնածու Նաիրա Վիգենի Հարությունյանին ազատությունից զրկելու համաձայնություն ստանալու մասին միջնորդությանը ծանոթանալու համար: Միջնորդությունը բավարարվեց, տրվեց ժամանակ՝ միջնորդությանը ծանոթանալու համար:

Հայաստանի Հանրապետության գլխավոր դատախազության կողմից Հայաստանի Հանրապետության Ազգային ժողովի 2026 թվականի հունիսի 7-ի ընտրություններին մասնակցող «Բարգավաճ Հայաստան» կուսակցության ընտրական ցուցակում ընդգրկված պատգամավորի թեկնածու Նաիրա Վիգենի Հարությունյանին ազատությունից զրկելու համաձայնություն ստանալու մասին միջնորդությունը հիմնավորելու համար ներկայացվել են նույն՝ 518 էջից բաղկացած փաստաթղթերը, որոնք դրված են եղել նաև Հայաստանի Հանրապետության գլխավոր դատախազության Հայաստանի Հանրապետության հակակոռուպցիոն կոմիտեում մինչդատական վարույթի օրինականության նկատմամբ հսկողության վարչության պետ Ա. Փանոսյանի կողմից 29.05.2026թ. թիվ 12/29/(3)-26 գրությամբ Հայաստանի Հանրապետության կենտրոնական ընտրական հանձնաժողով է ներկայացված՝ Հայաստանի Հանրապետության Ազգային ժողովի 2026 թվականի հունիսի 7-ի ընտրություններին մասնակցող «Բարգավաճ Հայաստան» կուսակցության ընտրական ցուցակում ընդգրկված պատգամավորի թեկնածու Նաիրա Վիգենի Հարությունյանի նկատմամբ քրեական հետապնդում հարուցելու վերաբերյալ համաձայնություն ստանալու մասին միջնորդության հիմքում, որով կայացվել է Կենտրոնական ընտրական հանձնաժողովի 2026 թվականի հունիսի 2-ի N 222-Ա որոշումը:

Նաիրա Հարությունյանի շահերը ներկայացնող փաստաբան Վահագն Բաբայանը հայտնեց, որ միջնորդությանը ծանոթանալուց հետո, այս դեպքում ևս՝ հիմքեր և փաստական տվյալներ չկան, որ տվյալ անձը խոչընդոտել է նախաքննությանը կամ կխոչընդոտի: Մինչույն ժամանակ հայտնեց, որ առկա է Ն. Հարությունյանի դրսևորած վարքագիծը, ներկայացել է նաև այս վարույթին, ուղղակի Ն. Հարությունյանն ունի հեղինակություն, լավ վարկանիշ, ինչպես նաև նոր հանցանք կատարելը վերագրել անձին, ով դատվածություն չունի, հիմնավոր չէ:

Հայաստանի Հանրապետության գլխավոր դատախազության ներկայացուցիչը պնդեց ներկայացված միջնորդությունը:

Սույն վարչական վարույթի շրջանակներում ուսումնասիրելով միջնորդությունը և կից ներկայացված նյութերը, ինչպես նաև լսելով վարույթի մասնակիցներին՝ Կենտրոնական ընտրական հանձնաժողովը գտնում է, որ Սահմանադրության 48-րդ հոդվածով

երաշխավորված՝ պասիվ ընտրական իրավունքի իրացմանը խոչընդոտելու նպատակ առկա չէ, ինչպես նաև Ն. Հարությունյանի և վերջինիս փաստաբանի կողմից չներկայացվեց դիրքորոշում, որ իր վերաբերյալ ազատությունից զրկելու համաձայնություն ստանալու մասին միջնորդություն ներկայացնելն ունի քաղաքական դրդապատճառներ:

«Հայաստանի Հանրապետության ընտրական օրենսգիրք» Հայաստանի Հանրապետության սահմանադրական օրենքի 90-րդ հոդվածի 5-րդ մասի համաձայն.

«5. Պատգամավորի թեկնածուի՝ մինչև պատգամավորի լիազորություններն ստանձնելն ընտրված պատգամավորի նկատմամբ քրեական հետապնդում կարող է հարուցվել միայն Կենտրոնական ընտրական հանձնաժողովի համաձայնությամբ: Առանց Կենտրոնական ընտրական հանձնաժողովի համաձայնության՝ նա չի կարող զրկվել ազատությունից, բացառությամբ, երբ նա բռնվել է հանցանք կատարելու պահին կամ անմիջապես դրանից հետո: Կենտրոնական ընտրական հանձնաժողովը նշված հարցի վերաբերյալ որոշում ընդունում է հանձնաժողովի անդամների ընդհանուր թվի ձայների առնվազն 2/3-ով: Սույն մասով սահմանված դրույթը չի տարածվում մինչև թեկնածու գրանցվելը ձերբակալված կամ կալանավորված քաղաքացիների, ինչպես նաև ձերբակալված անձի նկատմամբ կալանքը որպես խափանման միջոց ընտրելու և նշված անձանց կալանքի ժամկետը երկարաձգելու դեպքերի վրա:»:

Քննարկելով ներկայացված միջնորդությունը և ղեկավարվելով Ընտրական օրենսգրքի 90-րդ հոդվածի 5-րդ մասի պահանջով՝ Հայաստանի Հանրապետության կենտրոնական ընտրական հանձնաժողովը

### **Ո Ր Ո Շ ՈՒ Մ Է.**

1. Միջնորդությունը բավարարել՝ տալ համաձայնություն Հայաստանի Հանրապետության Ազգային ժողովի 2026 թվականի հունիսի 7-ի ընտրություններին մասնակցող «Բարգավաճ Հայաստան» կուսակցության ընտրական ցուցակում ընդգրկված պատգամավորի թեկնածու Նաիրա Վիգենի Հարությունյանին ազատությունից զրկելու վերաբերյալ:

2. Սույն որոշումն ուժի մեջ է մտնում նիստում հրապարակելու պահից:

3. Սույն որոշումը կարող է բողոքարկվել Հայաստանի Հանրապետության վարչական դատարան՝ օրացուցային երեք օրվա ընթացքում:

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ  
ԿԵՆՏՐՈՆԱԿԱՆ ԸՆՏՐԱԿԱՆ  
ՀԱՆՁՆԱԺՈՂՈՎԻ ՆԱԽԱԳԱՀ**

**Վ. ՀՈՎԱԿԻՄՅԱՆ**

2026 թվականի հունիսի 2  
ք. Երևան